


FASNACHTSGESELLSCHAFT



Fasnacht 2007

Vom Draummaa zem Drauma

oder S Credo vom ene verschupfte Maa

Zem Singe uff d Melody

„S Dschumbeli dyy - S Dschumbeli daa“
(E Dschumbeli isch so eppis wie-n e Obmaa)

Miir Männer händ s halt - schandbar schwär,
miir miend uns wandle - hii und här
vom padre de familias
zem staubsuugende Tobias

Uffgwaggse sind miir - alti Heere,
als eb miir uns - nie miesste weere!
Miir händ is alli gruusig dosche:
Sit 68 isch s ruggwärts glaffe.

Sit vierzig Joor - s isch kuum zem Fasse
fääle im Kaschte vo de Männer - e bar Dasse:
Mir mien ys ständig reformiere,
dermit uns d Fraue – toleriere!

D Fraue händ sich emanzipiert
und sind zem Byspiil dur d Stadt flaniert:
Uns Männer hän si dehaime glosse
und händ dr Pulver halt - elai verschosse!

Wenn si denn znacht no-n em Diniere
die neischte Fääne presentiere,
het uns das denne kuum no gschteert -
Uns het dr Stutz scho lang nimm gheert.

(Au) In dr Clique händ d Fraue d Hoose-n aa –
bi de PfyfferE findsch gar kai Maa –
kritisiere darfsch nit pessimistisch:
Das wär jo denne gar „sexistisch“!

So händ sich d Manne ganz verlooge,
ins aige Schnäggehuus zrugzooge,
händ butzt und kocht - ganz ungeniert!
Numme Kinder - hämmer kaini griegt !

D Evolution vom Aff - zem „Maa
haig säggs Millione Joor - bruucht ghaa!
Jetz kunnt – miir sind jo alli baff –
d Mutation - vom Maa zem Aff.

Die Sälbergschtriggte git s fascht nimme:
S sind numme d Machos, wo bestimme:
Dr Mustafa, Sinan und dr Sari –
iiri Fraue laufe Charivari!

E Macho isch, das waiss e jede,
e Ma, wo lyydet am Verbleede:
Drmit iin d Wyybli diend aagaffe,
binimmt är sich - wie Zolli-Affe.

D Saskia Frey und - d Pegoraro
händ deheim e – so-n e Macho-Sado:
Die maine bim Schmuuse, allem Aschyy n aa:
Jede Frosch wird ze-n eme rächte Maa.

E Draum-Maa kasch ibrigens - gar nimm kaufe,
är duet scho - vor de Pfyffer laufe:
Das exquisit bi de-n Alte Mugg
(Hinde gääb s denne no-n e Lugge)!

Gwelle: www.männerzytig.ch/

Post Scriptum 1:

Und s Drauma griegsch denn ganz elai,
wenn kunnsch am Donnstigmorge hai:
Stygsch ab vo dynere Fasnachtswolgge ...
muesch jetz erscht rächt - dr Alte folge!

Post Scriptum 2:

Halt! Das isch doch Fruschtration!
Jetz isch fertig, jetz git s Revolution!
Miir phosuune s uuse, ass es däscht und gracht:
Männer, mir gheere zrug an d Macht.

Gwelle: www.macho-ma.ch/n
www.versus.coeducation.ch/

D Ladäärne sinn vom Mäntig znacht bis am
Mittwuch demoorge uff em Minschterplatz.

www.muggedaetscher.ch